



Орган Лемковского Союза

Выходит в каждый четверг.

Редакция и администрация в Крыниці. — Адрес „Лемко“ Крыница.

Пренумерата в краю:
30 грошей місячно,
80 „ квартално,
1.50 „ полрочно,
3 зл. рочно.

В Америкі: 1 дол. рочно.

В Чехословакии:
2 кор. місячно, 10 кор. полрочно,
20 кор. рочно.

Ціны оголошень:

Ціла сторона 120 зл., $\frac{1}{2}$ сторони 60 зл., $\frac{1}{4}$ сторони 35 зл., $\frac{1}{8}$ стор. 20 зл., $\frac{1}{16}$ стор. 10 зл.; оголошення малы за 1 мм. 20 гр., в тексті 30 гр., перед текстом 40 гр. При місячном и долгом оголошеню значна знижка.

Контото чекове Нр. 404.155.

Третя рочница смерты Маршала Осифа Пилсудского.



В цілом краю отслужено в тот день заупокойны Богослуженя, в котрых приняли участь школы, уряды, войско и населене.

По школах уряджено академии посвячены памяти Великого Мужа. На академиях присутствовало множество населеня, оказуючи правдивый жал и честь, як живит для Незабытого Героя.

Дня 12. мая припала третя рочница смерты Освободителя Польци, Першого Маршала Осифа Пилсудского.

Опасность советско-японской войны.

Агенция Домей доносит, же по позороти марш. Блюхера с Москвы до Хабаровска армия советска на Далеком Выході ест значно укреплена. Приіхало там много новых отрядов войск панцерных и летничих ескадр. Также укреплено советску флоту на ріці Амур и в морской базі коло Владывостока.

Японскый министр заграничных справ Гирота, на конференции газетярской, на котрой было около 50-ох корреспондентов рижных газет, дал поясненя, высвітлюючи справу актуальной политики заграничной.

Отношения советско-японскы не сут добры и то по причині рижных спорных справ, котры Япония хотіла бы полагодити веі отраз, а Советы наміряют ограничити угоду лем до справ найпильнійших.

Отношения дыпломатычны не сут перерваны, але не сут они и добры, а если переговоры в ціли полагодженя спорных справ не дадут успішного результату, в таком разі будут ище планьши, як тепер.

Япония буде терпіти таке положене так долго, як долго буде тото возможно. Советы однак помагают милитарно Кытавы в значной мірі, не так значно однак, як хотіли бы того кытайцы. Советы повинны здати собі справу с безрезультатности давания дальней помочи Кытаю.

С одной стороны Советы пересылают новы войска на Далекий Выход, с другой стороны Япония заповідат, же таке положене буде терпіти лем так долго, покаль буде тото возможно. Чи в том всем не містит ся опасность, же положене зробиет одна або друга сторона невозможным и же треба буде спор рішити при помочи карабинов?

Втраты идучи в миллионы.

Нарікаме при каждой случайности на біду, але біді той не стараме ся зарадити. Правда, для села найважнійше ест тото, штобы зерно, паша, худоба и другы продукты сельского господарства мали високу ціну, але на том не кончит ся властиво жерело доходу с господарства.

Каждый человек, а передовсем селянин повинен быти ошадный. А мы, мусиме тото собі открыто и щиро сказати, не уміеме щадити. Маса річей вышмаряме яко непридатны, хоц они належито выкористаны могли бы дати нам значны доходы.

Недавно писали мы, якы великы гроши выдае Польца за спроваджане до краю старе желізо и стары шматы, хоц у нас валят ся по фосах и парнях маса потолченых бляшаных мисок и рижных желізных предметов, а также гние немало шмат, занечищаючи воздух, — днеска хочеме звернути увагу на шкоды, якы повстают с недбальства и лінивства.

Брудны стайні о згнилом, зловонном повітрі, брудны, гноем обліплены коровы и другы статкы, то перши річи, якы треба конечно змінити, если хочеме, штобы нам и нашим дітям жило ся лучше. Занедбана, брудна корова не може ся добре дойти аж и втотчас, коли кормиме ю добре.

Кромі того молоко от брудной коровы, нахозячей ся в смердячей стайні перейде скоро неприятным запахом стайні, и выроблене с него масло, яко маюче также тот запах, мусит мати низшу ціну от масла чистого и свіжого.

Таксамо бите звірят шкодит страшно звірятам и с битем худобы повинно село раз на все покончити. Коні и волю тягнут, килько старчит им сил, а если ктоси наладовавал на воз за тяжко, то треба воз похати самому, а не бити коні, бо то и так не поможе а коня може знаровити.

Бите шкодит также коровам и телятам, оно впливат некористно на выдайность молока и розвой организма, а побита або потолчена на возі свиня мае на торзі низшу ціну.

Не меньше от битя шкодит худобі гыт (хробацтво), котре, докучаючи худобі и выссаючи с ней кроє, также дійствує некористно для розвою худобы. Через такы занедбания маме в господарстві значно векши втраты, як сами думаеме.

Не здаеме собі справы с того, килько и якого молока дают наши коровы, а килько повинны давати при належитом их плеканю. Таксамо не думаеме над тым, якый прирост на вазі дают наши телята и свині и якый прирост ест возможный до одержаня и доконче потребный, штобы ховане телят и свиней ся оплачало. Нарікаме пак, же сельске господарство приносить втраты, а забываеме, же мы сами тому винни.

Не сут то однак одынокы втраты, якы видит ся по селах, ест их значно веце. Стают ся они правдивом причином біды на селі и тому в слідуючом числі знова о гдєкотрых с них напишем.

Втопил ся разом с конями. Николай Граб, селянин с Корнича коло Коломыи хотіл переіхати возом запряженным в пару коней через ріку Прут, штобы достати ся до села Грушова. На середині рікы коні впали в выжолобену яму и почали топити ся. Граб скочил до воды, штобы ратовати коні, але вода втягнула и его в яму и он утопил ся разом с конями.

Испанскы республиканцы просят о мир.

Испанскы националистичны газеты доносят, же республиканске правительство робит старания, штобы европейскы державы подняли на засіданю Лиги Народов инициативу в цілі закончення войны в Испании.

Газеты тоты атакуют республиканцов, же хотят робити с себе ангелов мира тепер, коли

грози́т им цілковите знищенє. Ген. Франко заявил, же не може быти бесіды о якоїси угоді с червеным правительством, а если республиканцы хотят перестати воювати, то мусят подати ся на ласку и неласку националистичных войск.

Чехословакия в клопотах.

Газеты цілого світа интересовали ся в последнем часі побытом Гитлера в Римі и бесідами, якы перевели Гитлер и Муссолини.

Италия приняла Гитлера с нечуваном парадом. Таких парад не роблено ани королям. На приїзд Гитлера побудовано спеціальны дома, переведено новы улицы в Римі, заложено много квітових огородов и т. д. Сам король выїхал на стацию, штобы привитати Гитлера и в его кареті разом с королем переїхал Гитлер через прикрашены улицы Риму, витаныи сотнями тысяч народа.

Але Гитлер выїхал до Риму не лем для парады. Он перевел там с Муссолиним ряд бесід, маючих велике значене для дальшой европейской политыкы.

Меже иншими бесідами порушено справу чешку, а именно оторваня Судетов от Чехословакии. Початково газеты доносили, же Муссолини радил Гитлерови поєздержность в спра-

вах чешкых, але послідны вісти сут такы, же Судеты мают творити своего рода независиму державу, контрольовану через гитлеровцов.

При таком стані справы правительство чешке може найти ся скоро в положеню австрийского канцлера Шушнига. Поза основными справами німецке населене Судетов уж тепер жадаєт, штобы им позволить витати власти по гитлеровскы и давати до газет оголошеня, поручаючи купно отберательных радио-стаций, так сконструованных, же достают они лем авдыции с Німеччины, без стаций чешкых.

Сут то річи неважны, але могут они подкочати повагу чешкых властей, котры в недалгом часі могут найти ся в положеню Шушнига. Німцы будут высувати чимраз смільши жадаєня, а если чешке правительство не даст им полной свободы, то могут вкочити гитлеровскы войска и перевести плебисцит.

Негус іде до Женевы. В Бразылии чужи не могут занимати ся политыком.

Негус приїждят до Женевы. Тота вість перед открытем засіданя Лиги Народов, на котром має быти рішена справа Абисынии, тревожит умы европейских политыков.

Гдеякы газеты сут мніня, же приїзд негуса на засіданє Лиги Народов спричинили французскы лівы партии, хочагы тым способом утруднити положене министрови Боннетови и Галифаксови.

Присутность негуса на засіданю Лиги Народов не може уж тепер отмінити судьбы Абисынии и дати положительны результаты, але може выкликати прикры несподіванкы и о то-то власне росходило ся лівым французским партиям.

„Убеме Сталина...”

Тайна радиостация в Москві надає все от часу до часу авдыции и грози́т Сталинови и его сторонникам.

Перед пару днями надала тайна стация цікавыи комуникат о параді дня 1. мая в Москві. Ведля того комуникату Сталин не присутствовал сам на Червеной Площі в часі дефиляды, бо боял ся о свое жите, лем выслал на дефиляду своего двойника (человіка совсем подобного до себе).

Тым двойником был грузин, коваль Рамишвили, котрый стало жие на Кремлю и в разі потреби выступує на парадах за Сталина. Комуникат заповідат, же як убють Сталина, то будут показывати Рамишвили, яко доказ, як рядил Сталин.

Дальше комуникат подає, же уж тепер на многих видных становисках находят ся люде, котры належат до „Союза освободителей”, але ище не сорганизовано належто цілой акци. Коли всі приготовленя будут зроблены, втотчас „Союз освободителей” даст знак до политычного переворота в Москві.

Опасность сектарства.

В повоенных часах починат ширити ся в наших горах сектарство. Дотепер обняло оно лем невелике число людей, але от часу до часу слышит ся, же в том або другом селі появлят ся якыйси новый апостол, котрый голосит и захвалят нову віру. Люде приходят с цікавосты, слушають незрозумілых им выводов и теории и часом попадають в блуд. Діє ся того звычайно лем длятого, же люде не знают, в чом містит ся суть науки сектарской и вірят добре платным агитатором, котры представляют им науку той чи иншой секты в захотяючих барвах.

Штобы хоц частично освідомити людей, и што вірят и што визнають голосителі рижных сект, подаме ту найважнійши секты, якы розвивають свою діяльність в Польщі.

У нас властиво сут дві секты: 1) рационалистична и 2) мистычна. До рационалистичной належат штундо-бабтысты, адвентысты, соботники и бадачы св. Писания. Штундо-бабтысты повстали с лютеранизма и кальвинизма и они отшмаряють всякы церковны обряды, задержуючы лем крещене и свхаристию и то лем в виді символа, представляючого еван-

гелиє. Дальше ище от вір и христовой отступити адвентысты, котры не вірят в безсмертность души, ани в нашего Спасителя Исуса Христа. Они ждуть на якогоси нового спасителя и на конец світа.

Соботники рижнят ся от них тым, же днем святочным ест у них, так як у жидов, субота.

Бадачы святого Писания визнають віру подобну до штундо-бабтыстов, але не признають Св. Тройцы.

Гдеякы не вдоволяют ся науком рационалистичном и вводят до ней элемент мистычный, низкый, допасованныи до умственного уровня своих членов. Тоты творят т. зв. секты мистычны, с посеред котрых найбільше знана ест секта русальников (зельносьвонтковскы), котры за свою „литургию” уважають співы, танцы, истеричны крикы и сыксульны оргии.

Друга мистычна секта, то сионисты-мурашковцы. Секту тоту основал Мурашко — пророк „Илии” разом со своим знакомом Ольгы Кирилюк. Секта тота ест признана за нелегалну и має сваих членов лем на Полісію.

Як видно уж с того короткого опису, всі сектарскы науки противлят ся науці Христа и яко такы не могут быти правдивом науком. Отшмаряючи всякы христьянскы обряды и вводячы на их місце співы, танцы и оргии, припоминають нам они науку поганску, котра ест науком дикых народов. Чи ж-бы и мы зачинили дичити и вертати до доисторычных звычаєв?

Стан озимини.

Головний Уряд Статыстычный зберат доклады с цілого краю о стані озимин на весну. Ведля тых докладов в том році озимы засівы перетримали зиму добре. Найлучше перезимовали одимины в воеводствах центральных, полудневых и западных. В воеводствах восточных стан озимин ест слабший. Причином того ест посуха в осени, котра спричинила, же озимини не закоренили ся належито в осени. Крім того в виленском воеводстві місцями сніг вылежал озимини, а понадто на озиминах появила ся сніжна плісь.

На загал однак стан озимин представлят ся добре.

Рослина, от котрой втічут всі овады.

Оден ученый англицкый, подорожуючы по Африці, зашол раз до хаты, положеной над ріком, где уносило ся множество мух и москитов и спостерег, што в хаті ніт ани одной мухы, хоц окна были поствераны наостіж.

Счудованныи тым небывалым явленем, довідал ся, же причиною того ест одна рослина, котрой запаху не переносят мухы и другы овады. Рослина тота не ест туюча, але ей запах ест так неприятный для овадов, же они старають ся втечи от рослины як найдальше и отлітають от ней так скоро, же часто ударяють о стіны с великом силом и убивають ся.

Рослину тоту думают выкористати для робленя с ней фабричного препарату, якый выганял бы мухы и другы овады с наших хат и ставн.

В Редакци „Лемка” в Крыниці можна достати ріжны книжочкы религийного содержания.

Овочи, яко соки.

В горах ест все ище за мало садов и перейде много часу, покаль горскы села окружают ся прекрасныма, зеленыма садами. В селах скомосованыя видно великий поступ садоводства. Там уж праві каждый господар має парудесят засаджених овочевых дерев. Деревы тоты роснут добре и оказуе ся, же и в горах можна сады закладати лем треба уважати, яки отміны дерев садити.

Явлене садження чим раз большого числа овочевых дерев ест барз потішающе, бо с часом розвиненія ся садов, найде населене в овочах здоровый корм, котрый ест потребный особенно для належитого розвита молодых организмов.

Же овочи сут потребны до удержаня здоровья людей, видиме того наилучше на малых дітях, котры жадно мечут ся на каждую зеленину, хоц она и квасна, тверда и несмачна. Смаковати такы дикы овочи не могут, а однак діти заідають их с охотом, бо их организм потребуе тых кормовых складников, яки находят ся в тых овочах.

Старши люде, котрых организм ест уж розвиненый, не сут так лакомы на овочи, однак овочи сут и для них потребны, бо дійствуют отживчо на организм и заховуют его в свіжости.

Знають о тых користных діланях овочей народы и в многих державах дбають о того, штобы овочи стали ся штоденным кормом каждого человека.

Овочи однак при перехованю их долший час псуот ся и на их переховане потреба много отвітно урядженого поміщеня. Штобы можна их было легче переховати, люде впали на помысл перерабаты овочи на суровы соки. Такы суровы соки мають всі складники даных овочей и сут незвычайно здоровым безалькогольным напитком.

Вырабляют их в специальных, на тоту ціль уряджених фабрыках. Соки тоты, то чистый сок овоча або ягоды без воды и цукру, містят в собі натуральный овочевый цукор и другы складники. Соки тоты пастеризуе ся, штобы ся не псули, ани не заміняли на вино и оцет, але не варят ся их, бо через варку стратили бы витаминны, складник барз важный для людского организма.

В Німеччині такы суровы овочевы соки пють люде вмiсто молока, в Швайцарии вырабят ся их найбільше, бо Швайцария, то край садов, а и у нас в Польщі ест уж фабрыка суровых соков коло Познаня, а тепер будуе ся другу фабрыку коло Ряшева.

Фабрыкы тоты для выробу суровых соков будут потребовати масу овочей. Коли возме ся под розвагу и тот факт, же до тепер спроваджат ся до Польщи масу овочей с чужих краев, то стане ясным, же заложене саду при сельском господарстві даст не лем добры овочи для родины, але также принесе значны материяльны користи.

Килько италиянов згынуло в испанской войні.

В Римі оголошено 14-ту листу италиянских легионистов, яки згынули в войні испанской. На листі той находить ся 229 назвиск.

В часі боев над Ебро в часі от 9. марта до 30. квітня было убитых 67 офицеров и 544 вояков, а 197 офицеров, 2.219 вояков было раненых, 11 вояков пропало без вісти а 3-ох достало ся до неволі.

Загальны втраты италиянскы в испанской войні выносят дотепер 5.041 люда.

Яблоко заслугуюче на увагу.

Часто при закладаню садов люде не звертають увагы на отміну саджених дерев овочевых. Яблонь, груша, черешня, слива и конец. Але яка то яблонь, вчасна чи поздна, яки має овочи и який ест их смак, о том довідуе ся господар аж втотчас, коли деревья зачнут родити.

Таке поступане при закладаню садов ест неправильне, если хочеме мати сад для продажы овочей. При торговельном саді мы мусиме числити ся с тым, яки яблока мають наилучшу ціну и яки яблока надають ся на тот климат, в яком хочеме закладати сад.

Кромі того для торговлі яблоск грае велику ролю отпорность яблока на гниле, а также и того, чи яблока дають ся долго переховати и чи не шкодит им занадто транспорт.

Садовники захвалюють сильно яблоко, котре называють „Онтарио“. Яблоко того походит с Канады и ест тепер найбільше поширеним яблоком в Німеччині. Деревы сут отпорны на мороз, на грунт не сут выбагливы, родят каждого року.

Яблока сут великы и тяжкы (4 на кильо) неровно округлы и в осени тверды як камень. Аж коли полежат стають ся червенавы и достають смак солодко-винный и сут сочны. Дають ся переховати до літа и то ест их може найкористнейше свойство, бо продае ся их в том часі коли яблока сут найдорозши.

Чи волк даст ся освоити.

Недавно мали місце два случаи зажертя дітей через освоеного волка. Гдеякы люде старають ся освоити волка. Чи даст ся он освоити? С тым пытанем звернено ся до дыректора Зоологичного Огорода в Варшаві дра Жабинского, котрый отвітил, же правдивый волк не освоит ся николи.

— Псы, званы волками — сказал др. Жабинский — не мають нич спольного с правдивым волком. Волк ест найдикшим звірем и если мале волченя дае ся погласкати и не робит никому кривды, то не прото, же оно привыкло и привязало ся до людей, але тому, бо ест слабе.

От шестох однак місяцов волченя стае ся чимраз дикше, а по рокови волк ест все для человека опасный. Прото до клітки с волками входит человек все с мітлом, штобы мал ся чим боронити. С мітлом иде тому, бо волк барже боит ся мітлы, як желізного прута, котрым бе ся его по голові.

Прото тыж, если кто хоче держати волка у себе, мусит его тримати або в клітці, або на сильной ретязи, котрой волк не мог бы росоувати.

Боливия запрашат жидов с Румунии.

Жидовска гмина в Букаресті достала от правительства Боливии предложене высылати жидов с Румунии до Боливии (державы в Полудневой Америкі). Боливийске правительство прирекат поменьшати жидовским имигрантом податкы через 25 літ и дати им даром кольонизационны терены, дерево и инший будовельный материял. Жиды мали бы основати в Боливии свои оселі, отділены от сел и міст, где живут автохтоны.

Попробуйме сіяти буркун

(Мелильотус альба).

Буркун ест у нас мало знаном рослином, але за то знае тоту рослину каждая канадийска фарма. Належит он до тых рослин, што и сіяный в гдеякых горских селах **болгай**, котры роснут на каждом грунті, сут отпорны на морозы, очищають грунт с буряну и справляють его.

Буркун має пару отмін, сут отміны жолты и білы, однолітны и дволітны, але с них найбільше поширена ест отміна дволітна, білого буркуна.

Буркун має свои недобры стороны, а именно ест он твердый и горкавый и худоба початково не хоче его істи. Але має он и добры свойства, а передовсем ест он барз вытревальный на морозы, што при остром горском климаті не ест маловажне, не боит ся посухы, а росне также и на жбырках, удае ся на каждом грунті и то без доброго пригноеня и кромі того сам удобряет грунт.

Вроды дае великы бо около 50 метрычных сотнаров с 1-го гектара. Штобы сіно было мягче, косят его высоко на яких 15 см. от землі и вяжуют в невеличкы снопкы, котры схнут около 2—3 тыждней, пак звозят до стодол. Уживають его также на зелену пашу. Втотчас приоруот буркун в осени.

Худоба початково неохотно заберат ся до буркуна, але поволи привыкат. Особенно скоро привыкають овцы.

Буркун має ище одну господарчу вартость. Ест он рослином высоко медайным. Коли он квітне, уж здалека розносит ся приятный запах меду, а поле ціле обляжене ест пчолами. Мед с квітков буркуна ест ясный, о приятном смаку и запаху и не цукріе скоро. Прото надае ся барз добре также для зимованя пчол.

В виду тых свойств буркун заслугуе на то, штобы селяне заинтересовали ся ним и посіяли его разом с овсом, або другим зерном. Повинни того зробити в першой мірі селяне-пасічники, бо будут мати напевно користь с пасік.

Килько людей гыне под колесами самоходов. В Парыжі іздыт по улицах самоходы так скоро, як жебы на улицах не было совсем людей. В р. 1925. было там уж 155,400 самоходов, котры убили 160 людей и зранили 2,607. В р. 1930 авт было уж 243.700 и убили они 285 людей, а зранили 2,088 людей. В р. 1935 авта выправили на другой світ 231 людей и поранили 1549, а в р. 1937 — 247 тысяч авт убило 246 людей и поранило 1742. Праві каждого дня гыне под колесами самоходу одне парыжанин, а 14 выходит с ранами або каліком.

В Америкі числа тоты сут ище высши, бо ял подають статыстыкы гыне там каждого року от переіханя автами около 60 тысяч людей. Правда, в той самой Америкі пол милиона людей жие праві стало в автах. Они переносят ся с небывалом скоростью с місца на місце и не мають нигде сталого помешканя.

Помер, як увиділ самолет. Не лем у нас гдеякы люде не виділи зблизка самолету, але и в Англии находить ся село Собертон, в котром аж недавно по раз перший приземлил ся самолет. Тота посадка самолету выкликала небывале заинтересоване в селі. Люде шмаряли роботу и біжали присмотріти ся нечуваному диву. Оден різник, Альберт Макон так поденервовал ся видом аеропляна, же не добіжал до місца, где был самолет. Он упал мертвый на розрыв сердца.

Што чути в світі и в краю

Страшний вибух в копальні. В копальні угля Маркгам в Англії наступил страшний вибух. В часі вибуху втратило жите 8 горников, а 123 люда ест засыпанных. Дотепер откпано и выдобыто на верх 27 люда, решту старают ся отнайти. В том числі ест 20 горников пораненых.

В січні 1937 р. в той самой копальні от выбуху згынуло 9-ох горников.

Жиды выїзджают с Відня до Мексыку. Газеты с Відня доносят, же жиды приготавлиаєт перший транспорт жидовской віденской молодежи до Мексыку. Транспорт тот має выносити 5.000 віденских жидов. По першом транспорті наступит дальша емиграция жидов до Мексыку.

Кромі той приватной емиграции німецкы власти мают в коротком часі выдати заряджене, регулюєє справу жидовской емиграции.

Розстріляно 45 „освободителей Росии“. Совітска тайна радио-стация доносит, же 3-го мая розстріляно 45 членов „Союза освободителей Росии“.

„Наших компанов — доносит комуникат — котры дня 1. мая хотіли убити Сталина, здраджено, але не падаме духом, бо наши компаны будут помщены“.

Документ питсбургской умовы везут словакы с Амерыкы. На польском кораблі, котрый має приїхати до Гдыні дня 26. т. м., ідут с Амерыкы словакы с документом важным для словаков в Чехословакии.

Документом тым ест угода заключена в Питсбургу в Амерыці меже чехами и словаками и гварантуюча словакам равны с чехами права в будучой независимой республиці чехословацкой.

Чехы по обнятію власти не додержали умовы и навіт уперали ся при том, што ніт такой угоды. Тепер писмо, в котром списано угоду, везе делегация словацка до Чехословакии. Делегацию мают в Гдыні встрітити послы словакы с Чехословакии.

Негус наробил клопоту Лигі Народов. Присланем своих делегатов на засідане Лигы Народов наробил негус не мало клопоту европейским политыкам. Справа допущеня делегатов на засідане была предметом отдільной тайной нарады, котра продолжала ся 3 години.

Ведля поголосок, якы кружат в Женеві, дискуссия на тоту тему была незвычайно оживлена. Несподівано для всіх, Совіты, поддержаны через делегатов пару инших держав заатаковали Англию, стремячи до розбитя умовы италиянско-англицкой через потворене внутренних трудностей для Галифакса.

Делегация французска, заскочена тьма атаками, на разі приняла вычекуючу позицию, боячи ся внутренно-политычных компликации в случаю выразной поддержки льорда Галифакса.

Под конец рішено, же делегаты негуса будут допущены на засідане Лигы Народов, але не яко делегаты Абисынии, лем яко представителі негуса.

Дітина о 4-ох очах. В Трапезунд в Турции уродила ся дітина о 4-ох очах, с котрых 2 сут поміщены над бровами на челі, а 2 нормально под бровами. Поза тым дітина ест нормальна и живе.

Населене досмотрює ся в том якогоси злого знаку и дораз, як довідано ся о том, згромадило ся масово перед хатом, хотячи убити и

матер и дітину. Аж полиция росогнала толпу. Матер и дітину перевезено под сильном ескортом до шпиталя.

Труют свои діти ядом с ужей. По цырках показуют нераз оказы ідовитых ужей, котрых укушене приносит людам смерть. В Индиях ест много людей, котры показуют рижны штукуы с тьма опасными гадами. Але тоты штукмайстры могут сміло то робити, бо там при ловленю ужей вырывают ему зубы и таким способом робят его безопасным.

Иначе однак поступают в Африці. Там уж от дітины призывчают малого до робления штук с ужами. Штобы однак укушене ужа не шкодило, то от дітины встрікуєт ему до крови по кус яду ужа. Организм таким способом привыкат до отруи и коли такой доросле, не шкодит ему нич укушене того страшного гада.

Волк знова зажер дітину. В послідном часі мал місце уж другой случай зажертя дітины через волка. С Вильна доносят, же освоеный волк шмарил ся на двох хлопчиков, котры выховывали ся в „Домі Дітины“. Хлопчики почали утікати. Один с них 12-літний Грицернишко пошпотал ся на несчастье и упал на землю.

Волк допал его и пережер ему горло. Покаль выбіжали люде, дітина уж не жила. Волк оставил свою жертву и скрыл ся в сусідном огороді, где застрілила его полиция.

Властителем волка был Карницкий, котрый мешкал недалеко. Он держал волка на ретязи. Попередной ночи волк урвал ся и надыбавши двох хлопчиков, одного с них зажер.

Страшна злива на Прикарпатской Руси. Перед пару днями над полночном частью округа Верховина на Прикарпатской Руси перешла шалена буря, котра тревала 4 години.

Лял так сильный дождж, же ріка Уж и ей притоки розляли ся по полях, нищачи засты и хаты. Дорогы сут поперерываны в многих місцах. В селі Жорнава уровень воды поднес ся о 2 метры 70 см. Вода знищила головно бідны села вздоляж дороги Ужгород-Умок. Вода пришла так скоро, же с многих хат лем с трудом потрафили утечи.

Графиня Вельпольска засуджена на кару пожизненной вязницы. Перед близко роком власти німецкы арештовали польску арыстократку гр. Вельпольску в часі, коли она переїзджала через Німеччину до Парыжа. Помимо старань и заходов не удало су родині освободити ю с арешту. В послідном тыждні

донесли, же гр. Вельпольску засудил німецкый суд на кару пожизненной вязницы за шпйонство.

Окрадали небощиков. В Японии в крематории (дом, в котром палят тіла померших зове ся крематория. В гдеякых державах ест звычай, же тіл померших не ховают в гробах, лем палят, а попел с тіл складат родина до посуд, званых урнами и переховує у себе дома) роботники заняты при паленю тіл выбрали с попелу золоты зубы, перстені и инши дорогие предметы. Ведля обчислень вартость зработанных таким способом предметов выносит около пол милиона ен. Роботников арештовано.

Умер б. румунский премьер Гога. Недавний премьер румунского правительства Гога умер дня 8 мая в своем дворци в Семиграді. Гога початково належал до партии национальной, а погодивше основал власну партию, котра называла ся християнско-национальном партиом румунском. Дня 28 грудня 1937 р. по уступленю правительства Татареску Гога одержал от короля мисию утвореня правительства, во главі котрого стоял до 10. лютого 1938.

Злива в Румунии. В результате долготривалых сильных дождей в Банаті, Бесарабии и полудневой Молдавии выляли рікы Бержава, Караш и Тимис, заливаючи три міста. Амуницийна фабрыка и фабрыка рольничих машин остали без електричного току. В селі Мониян втопил ся оден хлоп разом с конями. Люгазу — баба. Ціла долина вылядат як одно велике озеро.

Палячи ся авта вїхали меже людей. В часі автомобильных заводов под Лондоном мал місце страшный случай. На одном французском авті запалила ся бензына. Шофер хотіл задержати авта, але ідущий за ним другой шофер не потрафил задержати воза и ударил в паляче ся авта. Огень перенес ся на друге авта и оба авта, находячи ся в поломени, силом розгону вїхали меже тоту народа, приглядающо го ся заводом.

Маса людей, а также оба шоферы сут ранены.

ПОМІЩАЙТЕ
ОГОЛОШЕННЯ
В ГАЗЕТІ „ЛЕМКО“.

Комунальна Каса Ощадности Повіта Краковського в Кракові

Рок основаня 1882.

ЦЕНТРАЛЯ КРАКОВ, УЛ. ПИЯРСКА 1.
тел. 115-97, 131-73, 101-03.

О т д і л е н я : К Р Ы Н И Ц А , тел. 112.
В Е Л И Ч К А , тел. 6.

Всі порученя входячи в область банковости.

ПОРУЧЕНЯ ДЕВИЗОВЫ
ПОРУЧЕНЯ БИРЖОВЫ
СХОВОК АВТОМАТ,

СУМА ВКЛАДОВ ПОНАД 35.000.000 ЗЛ.
МАЄТОК ВЛАСНЫИ ОКОЛО 6.000.000 ЗЛ.

БЕЗОПАСНОСТЬ.

ДОБРЫИ ПРОЦЕНТ.